

# Konvensyen Wasatiyyah rumus tujuh resolusi



**ABD. Manaf Ahmad (dua dari kiri) menyerahkan resolusi konvensyen kepada Jamil Khir Baharom sambil diperhatikan Tan Sri Dr. Mohd. Yusof Noor dan Prof. Datuk Dr. Muhammad Muda pada Konvensyen Wasatiyyah Sempena Satu Milenium Islam di Nusantara di Hotel Pullman, Putrajaya, semalam. - MINGGUAN/ZAKI AMIRUDDIN**

**PUTRAJAYA 11 Jun** - Konvensyen Wasatiyyah Sempena Satu Milenium Islam di Nusantara yang berakhir hari ini, sebulat suara merumuskan tujuh resolusi untuk diberi perhatian oleh semua pihak.

Pengumuman ketujuh-tujuh resolusi itu dilakukan Setiausaha Ahli Jawatankuasa Resolusi Konvensyen Wasatiyyah, Datuk Abd. Manaf Ahmad setelah kesemua lima pembentangan kertas kerja pada konvensyen tersebut berjaya diselesaikan.

Beliau berkata, resolusi pertama menyatakan fakta ilmiah yang ditemui membuktikan kehadiran Islam kepada masyarakat Nusantara bermula sejak kurun pertama Hijrah dan satu kajian saintifik diperlukan segera bagi memuktamadkan hakikat tersebut.

"Kedua, sejarah kedatangan Islam di alam Melayu secara langsung telah memupuk konsep amalan wasatiyyah dalam masyarakat selaras de-

ngan tuntutan Islam yang syumul. "Ketiga, keperluan untuk mendalami konsep wasatiyyah secara lebih menyeluruh agar dapat menghindari salah tafsir dan elemen kontradiksi dalam pemikiran masyarakat," katanya ketika mengumumkan resolusi tersebut pada majlis penutup konvensyen itu di sini hari ini.

Majlis tersebut disempurnakan oleh Menteri di Jabatan Perdana Menteri, Datuk Seri Jamil Khir Baharom yang mewakili Timbalan Perdana Menteri, Tan Sri Muhyiddin Yassin.

Konvensyen selama dua hari dianjurkan Universiti Sains Islam Malaysia (USIM) dan Nadi Dialog Malaysia (Nadi) dengan kerjasama Jabatan Kemajuan Islam Malaysia (Jakim) itu dihadiri para pemimpin negara, wakil pertubuhan bukan kerajaan (NGO), ahli akademik, pemerhati politik serta mahasiswa.

Abd. Manaf berkata, resolusi keempat adalah melihat keperluan

untuk menterjemahkan konsep wasatiyyah dalam semua aspek kehidupan sebagai satu falsafah bangsa Melayu Nusantara termasuk dari sudut politik, ekonomi, sosial dan kebudayaan.

Beliau berkata, kelima, konsep wasatiyyah yang diamalkan oleh masyarakat Islam selama ini perlu diperkukuhkan sebagai teras agenda pengukuhan gagasan perpaduan ummah sejagat.

Resolusi keenam pula katanya, mencadangkan supaya sebuah institut strategik kajian wasatiyyah ditubuhkan bagi melaksanakan keperluan tersebut.

"Resolusi ketujuh menyatakan sebuah Suruhanjaya Penasihat Agama Islam yang bertanggungjawab kepada Majlis Raja-Raja Melayu juga perlu ditubuhkan bagi memantau dan mendapatkan nasihat tentang isu terkini hal ehwal agama Islam secara lebih efektif," katanya.